

Grunnegs – n golden taal

K(R)EUZE

nr. 0
22-05-2006

redaksie: Verl.Oosterweg 33, Noordhörn (0594-503095)
mailadres: jan_b@hetnet.nl

rondzendbraif veur laifhebbers
rondzendbrief veur liefhebbers

Inhold:

- WAT NOU WEER?
- REDAKSIE
- KEN JE DIZZE?
- SWAART GAT
- UTOPIA
- OP E FIETS NOAR DEN HORN

WAT NOU WEER?

Asmis mout je doun wat je nait loaten kinnen, in t Grunnegs. Zulf wat schrieven, aandern schrieven loaten, kennis moaken loaten mit (on)bekend waark, nijs, aal wat mie en joe (*jim*) veur de vouten komt, of veur de mond. Ogen en oren open, groalen, arregat zeggen, of arrejazzes. Aan vrunden lezen loaten, aan familie, aan noabers. En of t nou oet Oost komt, of Noord, of Westerwolle, *of hier uut t Westerkwartier*, wat kint verschelen. Kom mor op mit wat je kwiet willen: gedichten, verhoalen, mopkes, agendanijs.... k Begun mit de kurzisten van "t Grunnegers veur begunners" dij mitdoan hemmen in de Dörpsstee. Dij gain belang het bie K(R)EUZE, gef t mor even deur. t Kin wezen dat er wat moois wazen gait, t kin ook binnen de körtste keren kullen.

REDAKSIE

Alleneg is mor alleneg mit zien veurs en tegens. Mor as der aine (of twije, of drije...) helpen willen, is mie dat wel wat weerd. (Kop kovvie of thee of zukswat). Denk der mor even over, mor nait te laank.

KEN JE DIZZE?

Bij toeval ondekt:

www.dideldom.com

Gedichten, verhoalen, van alles wat. Kiek zulf mor ies. Niet bepoald zonder lek en brek, mor dan wiet je ok weer waarom jim n kurzus doan het (of doen moeten...)

SWAART GAT...

Smoandagsoavends gain Dörpsstee meer, gain kurzuslaaider Loer dij je mit diktees, Biebelteksten of waarkwoorden as "oettiggeln" om d'oren slagt. Swaart gat noa vieftien keer veurlezen, maggeln en verhoal van Ubel Wierda op stoere woorden oethippern (zol dit grunnegs wezen?)

Vervolgkurzus? Zol kinnen, mor doar mouten we din wel eerst meer over waiten. Mit n stuk of wat mensen hemmen we ook al proat over zukswat as n leeskringe. Ho ho, nait doadelk tegensputtern, as je n nijmoodsere noam waiten.... Kom mor op! Veur de zummervekansie wordt dat niks meer, mor vanoaf september ist n aantrekkelke meugelkhaid. Hou zetten we dit in de staaigers?

- **WAT goan we doun?**
- **WOAR doun we dat?** (Dörpsstee wordt vernijd)
- **WEL doun der mit?**
- **WANNEER goan we krinkjelezen in t grunnegs?**

Elkenien die zuk aansproken vuult, wordt verzöcht kontakt op te nemen met redaksie!

UTOPIA

woar blifst
laand van gelok

woar doe nait bist
en ik die mok

Oet: "Tougelieks" **Saul van Messel**
Verzoamelde Grunneger Gedichten 1977-1987

OP E FIETS NOAR DEN HORN

Op e fiets noar Den Horn, jim kan je beroerdere dingen denken. Bewegen is t toverwoord van dizze tied, of niet dan? Nou niet votdoadelk begunnen te kauweln over die fiets van mij, met roestplekken op stang, stuur en velgen. Dat komt deurdats pervinsie liefhebbert ien streuen met zolt vanoaf t ogenblik dat Piet Paulesma mekkert over nachtvorst en zukswat. Van noature ben ik ok niet zo'n poetser, kan mij niet best bukken. k Wol eerst nog specioale pekelbeschermers aanbrengen

op e zijkanten van mien Vriese stamboektwijwieler, mor doar schien je ok al n vergunnen veur hemmen moeten (€ 28,75 bij de balie ien t gemientekantoor en ordentelk op je beurt wachten...)

Stuk langs Vriesestroatweg is omstreden deur al dat gejakker van dat nijmoodse wat-heb-ik-ja-n-hoast-verkeer. Dan kiek ik mor noar links, die ofwieken heb ik toch al. Nou stoan doar nog twij boerenploatsen in n groene ruimte (behaalven as t snijd het). Vertel mij wat, dat het ok ja langste tied duurd. Nog even en dan stampen ze poalen de grond ien en n vracht huzen, n zorgstee en n bezindepomp de grond uut. Zuudhorn wordt opstöt ien e vaart der volkern, wetholders bennen der veur noar t spierverstarkersstee west om mor genoeg ien e mouwen te hemmen, aans komt der van dat stöten ok ja niks terecht. Kiek, doar gijt weer n reiger met n protestbord: "Oostrand oafblieven!" Gister hielden eenden n demonstroatsie bij t gemientekantoor met spandoeken:

"Oostrand is meer dan Oostergast, wij heuren der ok bij!" Burgemeester wol ze aalmoal ophokken ien e trouwzoal, mor doar stak gemientesekketares n stokje veur, pepieren waren niet ien orde en t was ok nog niet ploatst ien t bokkebladje. "Krieg je mot met," zei e.

As ik bij de Hogeweg ben, moet ik met gevoar veur eigen hals- en bienbreuken de straatweg over, mor dan kom je ok ien n aandere wereld. Eerst al die spuitbusuutspattens op de schoapenshuur, kunst met n woepster van n K. Dan komt jim bij de Hoge Hoeve, drijsterrendierenpension met twij dikke Belgen ien e bewoaken. En n ruimte der om hen, komst ogen tekort. Hest nog mor krekt twij zwoanen ien t vizier kregen, of der suust al n wiekel deur dien blikveld. En doar n greide met almoal kiewieten, juust weerom uut Oafrika. Elk half uur roast der n gele rupe veurbij.

Even verder, mor dat wis ik toen nog niet, komt de grootste verrassen. Ien n bocht van de Hogeweg stijjt n bank, of eiglieks n pak-spul-mor-uut-tafel. Ik even van e fiets of, moet mien neus snuten en kan mien buusdoek niet vinden. Ieniens heur ik:

"Hé, psstt!"

Ik kiek om mij hen, gien mens te zien.

Nog n moal: "Hé, jim doar, psstt! Hier bennen we, aan slootkaant!"

Stoan mie doar twij ganzen te smoezen met mekoar. Ze fladdern mij dichterbij. Ik d'r noar toe.

"Joa, wij moeten wat stiekem doen, mensen hemmen almoal griep ien e kop en doar kriegen wij de zenen van. Ik ben Hakan Hazzenson en dit is mien wief Kälin Verstaanderbie", mor zeg mor Knelis en Knelske, das korter."

"W-w-wat wil je van mij? " stotter ik.

"Klein beetje begrip mien jong, veurdat alle vremde vogels aan kaant makt worden. Wie willen jim wat zien laten, mor dan moet jim wel met ons met. Het jim wel iens heurd van Niels H.? Joa, zo willen we dat met jim ok doen. Jim moet even wachten tot dij groene Peugeot veurbij is, zit n vrouw ien. Kiek iens an, ze lagt en zwaait. Kent jim heur? Jim kent wel veul vrouwen, dunkt mij, krieg ik gien kans veur..."

Hij kikt even schuun achterom noar Knelske die n duustere blik ien e ogen het en met linkervleugel dreigt.

"Zo, hier het jim n verkleiningspil, hiel deurslikken en dan op mien rug, nek goed vasthouden. Het jim de fiets op slot? Joa? Veuruut met e geit!"

De twij ganzen vliegen op, ik hol mij stief vast.

Jan Blaauw
Noordhörn, 8/3/06

Dit is dus n perbaaisel, n probeersel. Nummer nul, t kin ale kaanten op. n PROEF, pruuf der van en loat even wieten wat jim der van vinden. Moet t toch meer ien t West-Grunnegers? Of goan we veur n MIX van alles wat mor ien onze pervinsie te vinden is? Drukken we benoam aigen waark of? Hoeveul ruimte gunnen we aan schrievers uut t verleden of van buten? Oorspronkelk of vertoald? Ach, wat moakt t oet, wat moakt t uut....

Grouten/groeten,

JB

